

四庫全書

史部

欽定四庫全書

史部

河南通志卷六十九

詳校官監察御史臣莫瞻菴

檢討臣德生覆勘

總校官編修臣王燕緒

校對官學正臣常循

謄錄監生臣劉家瑛

欽定四庫全書

河南道志卷六十九

流寓

古者諸侯大夫各守其國世其爵祿然列國有寓
公之禮而大夫亦往往游仕他邦如防叔自宋遷
魯為孔氏祖堯之後在晉為范氏在秦為劉氏記
所稱別子為祖者皆是也後世郡縣寓內天下一
統士得安其土著食舊德服先疇幸矣然或仕宦

而樂其風土或遭亂而播遷杜甫流落劍川後人猶
援以為重赤甲東屯之名與山川相輝映豈非地以
人靈而文章氣節有不可得而泯者耶中州為四方
戾止地漢晉以來遊梁入洛者勿論迨宋元祐諸老
致政間居與伊川堯夫並卜宅於洛水之上德星聚
矣志流寓

開封府

戰國虞卿趙人趙孝成王時拜上卿故號虞卿時魏

相魏齊亡走趙匿平原君家秦昭王欲為范雎報
仇貽書趙王令斬魏齊魏齊夜亡過虞卿虞卿乃
棄相印與魏齊亡走大梁欲因信陵君以走楚信
陵君畏秦初猶豫未肯見後以侯嬴言駕如野迎
之魏齊已自刎虞卿遂流寓大梁不得意乃著書
上採春秋下觀近世曰節義政謀凡八篇世傳之
曰虞氏春秋

漢司馬相如字長卿蜀人遊梁為梁孝王客居數歲

著子虛賦後武帝讀其賦飄飄有凌雲意召拜為郎

鄒陽齊人始仕吳見吳王有異志乃去吳遊梁陽
智畧忼慷不苟合羊勝公孫詭等嫉陽護之孝
王怒下陽吏將殺之陽從獄中上書孝王立出
之卒為上客後勝詭以邪謀獲罪孝王得自全于
漢鄒陽之力居多

枚乘淮陰人始仕吳以吳王濞有異志上書諫諍

王不從乃去吳游梁與鄒陽莊忌之徒為孝王客
以文辭見重

枚臯字少孺乘子乘在梁娶臯母為小妻乘東歸
臯母不肯隨乘怒分臯數千錢留與母居年十七
上書梁共王得召為郎後之長安上書北闕自陳
枚乘子上大喜召見待詔臯因賦殿中詔使賦平
樂館善之拜為郎臯為文疾受詔輒成故所賦者
多司馬相如善為文遲故所作少而善于臯臯賦

辭中自言為賦不如相如凡可讀二十篇

南北朝樊遜字孝謙河東北猗氏人性至孝喪父負土成墳植栢方數十畝朝夕號慕復感母言專心典籍恒書見賢思齊四字自勵屬本州淪陷寓居鄴中為臨漳小吏擢主簿武定七年徙陳留梁州刺史以遜兼錄事參軍仍舉秀才第一清河王岳為大行臺率衆南討以遜從軍假大行臺郎中使江南得報岳因與修盟大軍還鄴以都官尚書舉

薦遷吏部詔令校定羣書清河初為主書參典詔
策天統元年加員外郎卒

宋馮元字道宗始平人三世事嶺南為日官隨劉鋹
歸宋遂家開封博通五經舉進士累官國子直講
真宗召講周易泰卦元推君臣交感之義上大悅
仕終戶部侍郎卒贈本部尚書謚章靖

王旦字子明大名人父祐太平興國初以史館修
撰知開封府因家焉旦舉進士累官至右僕射三

遷至太尉天下稱為賢相卒謚文正乾興初詔配
享真宗廟庭墓在府城東三子雍國子博士冲左
贊善大夫素尚書左丞

錢惟演字希聖杭州人父吳越王俶歸宋賜第開
封因家焉惟演少有俊才累官兵部尚書樞密使
天聖中改崇信軍節度使卒于官贈侍中謚文僖
所著典懿集三十卷從弟晃進士及第累官右諫
議大夫易累官翰林學士

劉安世字器之魏人少為文彥博獎識既舉進士
不就選從學司馬光谷盡心行己之要光告以自
不妄語始調洺州司法宣仁太后時擢右正言進
諫議大夫未幾遷寶文閣待制樞密都承旨正色
立朝面折廷諍旁侍者悚汗目之曰殿上虎章惇
惡之初黜南安軍再貶少府少監三貶新州別駕
安置英州同文館獄起蔡京乞誅安世讓雖不行
猶徙梅州惇與蔡卞欲必置之死因使者入海島

諷使過安世脅令自裁又擢一土豪為判官使殺之其人將入境一夕斃乃免投荒七年凡遠惡地無不歷之蔡京既相連七謫至陝州羈管稍復承議郎卜居宋都宣和七年卒

元羊仁廬州人至元初阿珠兵南下仁家為所掠父被殺母及兄弟皆散去仁年七歲鬻為汴人李子安奴力作二十餘年子安憐之縱為良仁踪跡得母於潁川兄於睢州弟於邯鄲皆為役尚無恙乃

偏懇親故貸鈔百錠歷詣諸所求贖之經營百計
更六十年乃得遂大小二十餘口復聚居為良孝
友甚篤鄉里嗟之大德二十年旌其家

明薛瑄字德溫號敬軒山西河津人父貞永樂中除
鄆陵教諭時制郡邑乏科貢之士司訓者充戎貞
憂之瑄於是隨父任補弟子員是年庚子發解河
南明年登進士授監察御史手錄性理大全潛心
誦讀深造力行著讀書錄正統初視學山東首以

白鹿洞學規開示學者遷大理少卿時王振勢蹶
薰灼欲借交于瑄以為重瑄不納振恨甚會平反
冤獄事連振姪山為振誣陷坐大辟後減死削籍
放歸景泰初起大理寺丞尋陞南京大理卿天順
改元遷禮部右侍郎兼翰林院學士召入內閣知
制誥尋為會試總裁事竣轉左侍郎居數月見石
亨等亂政瑄嘆曰君子見幾而作寧俟終日耶乃
移告西歸卒年七十六詔贈禮部尚書謚文清隆

慶六年從祀文廟

宋禮字惟寅直隸大興人成化中進士歷遷河南副使提督學校正身率物士類馴服尋擢按察使時逆瑾用事禮以抗直免官貧弗克歸寓陳留作草舍一區玩易于中歷二十餘年食或不繼有餽者輒謝弗受及邁疾屬其子曰葬縣東俟有力歸祔先塋語畢衣冠端坐而逝

阮漢聞字太冲本浙人居汴以尉氏阮故土也徙

居焉博覽墳索篤志古業中州士翕然從之游戶
外屢恒湍屢微不起卒有詩集數卷行世

歸德府

唐高適渤海舊人少獲落不事生業家貧客於梁宋
以詩名釋褐汴州封丘尉累官刑部侍郎轉散騎
常侍加銀青光祿大夫進封渤海縣侯

宋田京字簡之滄州人徙鹿邑舉進士累官兵部郎
中知滄州拜右諫議大夫卒京尚氣節喜論議頗

通兵戰歷算之術所著有奏議十卷

杜衍字世昌山陰人少苦志篤學擢進士第寶元
中累官同平章事集賢殿大學士兼樞密使薦引
賢士沮抑僥倖朝廷賴之慶歷七年以太子少師
致仕年八十七寓居睢陽與侍郎王渙司農卿畢
世長郎中朱貫馮平結社賦詩如香山故事睢陽
人敬如神明繪像以傳皇祐中遷太子太保召陪
祀明堂衍稱疾固辭進太子太師封沂國公卒贈

司徒兼侍中謚正獻渙太原人年九十世長雲中
人年九十四俱致仕家睢陽貫沛國人年八十八
平始平人年八十七俱致仕家南都

范仲淹蘇州吳縣人仲淹少孤隨母適長山朱氏
讀書應天因家於寧陵舉進士第為廣德軍司理
參軍迎其母歸養改集慶軍節度推官始還姓更
其名晏殊知應天召真府學尋通判河中府徙陳
州江淮京東大蝗旱命安撫之還以太平州民所

食烏昧草呈進出知睦州召還判國子監元昊反
知延州分六將城清澗請建廊城又修承平永平
等十二砦改邠州觀察使城大順城築細腰葫蘆
諸砦仲淹上書秦州委文彥博慶州用滕宗諒元
昊請和乃召拜樞密使除參知政事後以陝西四
路宣撫使知邠州徙潁州未至卒年六十二謚文
正先是仲淹以中庸授張載實開理學之源為文
必原本六經又自少即以天下為己任先憂後樂

蓋本學問為經濟者康熙五十三年從祀文廟

元趙天麟東平人僑寓夏邑博學能文舉鄉貢所著
有太平金鏡策行世

皇清陳維崧字其年宜興人祖于庭前明左都御史父
貞慧與商丘侯方域交善同罹阮大鍼之禍方域
避亂陽羨以女許字維崧弟宗石後宗石入贅遂
為宋人維崧亦寓宋與弟同居維崧為文長於排
偶長洲汪琬稱為七百年一人後以博學宏詞徵

除翰林檢討纂修明史卒於官

彰德府

隋盧大翼字協昭河間人閒居味道不求榮利博綜羣書尤善占候紀算之術徙居林慮山茱萸澗請業者自遠而至初無所拒久之坐事當死高祖惜其才釋之後目盲以手摸書而知其字大業末卒于洛陽

宋李士明大名人徙居相州累世同居信誼氣節聞

於河北與寇準為布衣交比準守魏郡以狀奏聞
旌表其門子輩天聖八年進士

元李秉彛北平人徙家於相讀書工篆隸為彰德路
轉運使歷戶部尚書所居有閑邪齋號閑邪老人
有文集

王博文東魯人徙家於相從憲宗南征歷官禮部
尚書後遷江南道行御史臺中丞卒贈魯國公謚
文定

高鳴真定人徙家於相少以文學知名累官彰德路總管政暇詣學舍親講經義境內化之郡邑知有經學自鳴始世祖即位賜誥命金符召為翰林學士累官吏部尚書卒謚文獻所著有河東集三子書訓翰林直學士易訓河北道廉訪副使詩訓太常博士

明謝榛字茂秦臨清人以詩雄于時嘉靖中與王世貞李攀龍等倡和稱七才子趙康王聞其賢厚幣

延之待以上客遂占籍安陽

衛輝府

周呂尚字牙嘗居東海史記世家作東海上人其先
為四岳佐禹平水土有功封于呂本姓姜從其封
姓曰呂年七十屠牛朝歌久之去隱於磻溪周西
伯出獵遇之與語大悅曰自吾先君太公望子久
矣故號太公望載歸後佐武王克商又號師尚父
封於齊

宋高若訥山西榆次人徙居衛州舉進士累官龍圖閣直學士史館修撰進工部侍郎參知政事兼樞密使卒贈右僕射謚文莊若訥彊學善記自秦漢以來諸傳記無不該通因母病兼通醫書張仲景孫思邈諸方書久不傳者悉考校訛謬行于世又考定鐘律并損益祠祭服器悉見施行有集二十卷

邵古字天叟范陽人幼孤事母孝力貧奉養長益

好學必求義理之盡天聖中嘗登蘇門山顧謂其
子雍曰若聞孫登之為人乎吾所尚也隨隱於山
下年七十九卒所著有正聲正字正音等三十篇
元姚樞字公茂柳城人居洛陽太宗時為燕南行臺
郎中以臺長事貨賂棄官携家來輝州作家廟別
為室奉孔子及宋諸儒刊諸經授學者讀書鳴琴
若將終身時許衡在魏至輝就錄程朱所註書以
歸謂其徒曰曩所授受非是今始聞進學之序既

而盡室依樞以居世祖在潛邸召樞至大喜待以
客禮動必咨問及即位累官至中書左丞昭文館
大學士翰林承旨卒贈太師魯國公謚文獻子煒
仕至平章政事卒謚文忠

姚燧字端甫三歲而孤育於伯父樞教督甚嚴燧
不能堪楊奐馳書止之曰燧令器也長自有成何
以急為且許醮以女年十三見許衡於蘇門十八
始受學至元中為秦王府文學累遷翰林學士元

貞初奉詔修世祖實錄書成詔拜太子少傅明年
進翰林學士承旨又四年告歸卒謚曰文

懷慶府

漢石奮趙人趙亡徙居溫高祖東擊項籍過河內奮
年十五為小吏高祖與語愛其恭敬問曰女何有
對曰奮獨有母不幸失明家貧有姊能鼓琴高祖
曰若能從我乎對曰願盡力高祖召其姊為美人
以奮為中涓使受書謁景帝初累官至九卿子建

慶等皆以孝謹聞官至二千石景帝號奮為萬石君諸子孫為吏至二千石者十三人

晉嵇康字叔夜譙國鉅人早孤有奇才學不師授博覽該通長好老莊常修養性服食之事寓河內山陽二十年與阮籍山濤向秀劉伶阮咸王戎為竹林之遊宅邊有一柳樹常鍛其下潁川鍾會往訪康不為禮後坐呂安事會譖於文帝遂見害

韋況京兆萬年人少隱王屋山孔述睿稱之及述

睿以諫議大夫召薦况為右拾遺不拜未幾以起居郎召半歲輒棄官去况雖世貴而志冲遠不為聲利所遷當時重其風操

宋傅堯俞字欽之鄆州須城人徙居濟源十歲能為文及登第猶未冠嘉祐中為監察御史屢進諫言英宗立遷右司諫以論新法不便出為河北轉運使元祐中拜中書侍郎司馬光嘗以清直勇稱之卒謚獻簡

元李俊民字用章山西澤州人得河南程氏正學金
承安中舉進士第一授翰林未幾棄官不仕金既
南遷俊民隱于嵩山後徙懷州世祖在潛邸以安
車召至咨訪無虛日遽乞還山遣中貴護送之及
卒賜謚莊靜先生

郝經字伯常山西陵川人金末父思溫避地魯山
遭河南亂居民走匿窟中亂兵燎烟迫之燔死者
百餘人經母許亦預焉經以蜜和寒蘆汁啟母齒

灌之得蘇時方九歲人皆異之既長肆力於學嘗
自誦曰不學無用學不讀非聖書不務邊幅事不
作章句儒世祖在潛邸召見與語大悅會大舉伐
宋兵趨鄂岳經言巴蜀地險鑿輿西邁非萬全之
舉宜修德以應天心布澤以係民望相時而動江
左不足圖也世祖偉其說會宋請和即命班師及
即位以經為翰林侍讀學士奉使告即位於宋且
徵請和之議既至賈似道館之于儀真不聽其入

經上書開陳古今和戰利病喻以禍福存亡累數十萬言皆不報拘留十六年始歸卒葬孟縣西郭門外其家集云世祖賜第在懷孟賜田在河陽因以為家所著有續後漢書易春秋外傳通鑑書法及文集凡數百卷

王磐字文炳廣平人世業農父僖金人遷汴舉家渡河居汝之魯山磐年方冠從麻九疇學於鄆城客居貧甚日作粥一器畫為朝暮食至大四年擢

進士第授歸德府錄事判官不赴及河南被兵磐
又寓河內世祖召拜翰林直學士累遷資德大夫
致仕卒封洛國公謚文忠

呂文卿潁川人隱居濟源至正間妖賊半破周等
據覃懷文卿贊襄總兵招義兵萬餘人討平汝潁
鈞許以至鳳翔關陝秦隴冀晉之區威信服人上
以忠義旌之授中書叅政

明楊立山東鄆城人從父宦遊江南父卒奉母居覃

懷家貧授徒以供甘旨母卒哀毀廬墓三年後之
江南求祖父柩山東求祖母柩葬之不憚勞苦人
稱孝子

河南府

秦孔鮒字子魚孔子八代孫該通六藝始皇時召為
魯國文通君拜少傅及李斯議焚書鮒懼遺典滅
亡藏書壁間隱居嵩陽授弟子常百餘人後陳涉
起為楚王聘鮒為博士鮒託疾而退卒於陳著書

二十餘篇曰孔叢子

漢周黨字伯况太原廣武人建武中徵為議郎以病去職携妻子居澠池復被徵不得已著短布單衣穀皮綃頭待見尚書及引見伏而不謁自陳願守所志光武許之黨歸澠池著書上下篇而終邑人祀之

班超字仲升扶風平陵人兄固任洛陽校書郎超隨母至任家貧常為官傭書以供養久勞苦投筆

嘆曰大丈夫無他志略當效傅介子張騫立功異域取封侯安能久事筆硯乎永平間用薦奉使西域累建殊勲封定遠侯永元十四年上疏乞歸詔許之還洛踰月而卒

郭泰字林宗太原介休人家世貧賤早孤母欲使給事縣庭泰曰大丈夫焉能處斗筲之役乎遂辭就成臯屈伯彥學三年博通墳籍善談論美音制乃遊於洛見河南尹李膺膺大奇之遂相友善於

是名震京師及歸衣冠諸儒送至河上車數千兩
泰惟與李膺同舟而濟衆賓望之以爲神仙

晉劉宏字和李沛國相人有幹畧政事才少家洛陽
與武帝同居永安里又同年共研席以舊恩起家
爲太子門大夫累遷寧朔將軍假節監幽州諸軍
事以勳德兼茂封宣城公太安中轉鎮南將軍都
督荊州諸軍事永興初卒於位贈新城公謚曰元
陸機字士衡吳郡人少有異才文章冠世太康末

與弟雲入洛遇太常張華華素重其名如舊相識
曰伐吳之役利獲二俊以預誅賈謐功賜爵關中
侯時晉室將傾顧榮戴淵等咸勸機還吳機負其
才望志匡世難不從卒及于難臨刑嘆曰華亭鶴
唳豈可復聞乎時年四十三弟雲及二子俱被害
顧榮字彥先吳郡人與陸機兄弟同入洛稱江東
三俊居數年從元帝渡江仕至散騎常侍

趙至字景真代州人寓居洛陽緱氏令初到官至

年十三與母觀之母曰汝先世非微賤遭世亂遂
為士伍耳至聞母言詣師受業聞父叱牛聲投書
而泣師怪問之曰未能榮養使父老不免勤苦師
異之年十四遊太學遇嵇康寫石經徘徊視之不
能去因母亡號痛嘔血而卒

南北朝楊愔字遵彥華陰人幼受詩易好左氏春秋
及長能清言容止可觀識者多以遠大許之元魏
永安中拜散騎常侍愔以世故未平志在潛退乃

謝病隱於嵩山北齊神武時徵赴晉陽拜大行臺
右丞未幾棄衣冠於水濱變易姓名自稱劉士安
入嵩山與沙門曇謨屏居削跡後神武徵至復其
官封華陰縣侯

唐杜甫字子美其先襄陽人以祖依藝令於鞏因僑
居焉甫少貧不自振客吳楚齊趙間李邕奇其才
先往見之舉進士不第天寶中獻大清真宮饗廟及
郊祀賦三篇明皇奇之授右衛率府胄曹屬京師

亂步謁行在拜左拾遺以直言出為華州司功尋
遷京兆功曹嚴武節度劍南奏為工部員外郎參
謀軍事居成都草堂浣花里旋棄去扁舟下荆楚
間竟以流寓卒旅殯岳陽元和癸巳始與妻楊氏
合窆首陽山前

白居易字樂天太原人貞元中舉進士補校書郎
遷翰林學士會昌初以刑部侍郎致仕歸洛居履
道里疏沼種樹構石樓於香山鑿八節灘稱香山

居士常與胡杲吉叟鄭據劉真盧慎張渾李元爽
僧如滿燕集人慕之繪為九老圖卒贈尚書右僕
射宣宗以詩弔之弟行簡擢進士敏而有辭官至
振武營田使

盧鴻一字顥然范陽人徙洛陽博學善籀書結廬
嵩山開元初再徵不至五年詔有司齎束帛徵之
鴻一至東都帝召升內殿置酒拜諫議大夫固辭
詔許還山歲給米百斛絹五十疋朝廷得失具以

狀聞將行賜隱居服鴻一到山中廣學廬聚徒至
五百人及卒帝賜萬錢鴻一所居室自號寧極
裴度字中立聞喜人貞元初擢進士第累拜門下
侍郎平章事討吳元濟有功進洪文館大學士知
政事太和四年出為山南東道節度使頃之請乞
不許八年徙東都留守俄加中書令時閹豎擅威
度不復有經濟意乃治第東都集賢里作別墅號
綠野堂野服蕭散不問人事帝知度年雖高神明

不衰每使臣自洛來必問度安否開成二年復以
本官節度河東明年以病丐還東都卒贈太傅謚
文忠

溫造字簡與并州人姿表瑰傑性嗜書然盛氣少
所降屈不喜為吏隱王屋山人號其居曰處士墅
後隱東都烏重胤奏置河陽幕府為御史時李祐
違詔進馬造正衙劾之祐曰吾雪夜入蔡州擒吳
元濟未嘗心動今日膽落溫御史矣仕至禮部尚

書又見名宦志

李渤字濟之魏橫野將軍發之裔初隱廬山後徙少室山元和初以右拾遺召不赴韓愈遺書促之始出家東都每朝政有闕輒附章列上九年討淮西上平賊三術及禦邊新錄以著作郎召渤乃起歲餘遷右補闕後以直忤出為桂管觀察使踰年謝病歸洛太和中召拜太子賓客卒贈禮部尚書孟郊字東野武康人少隱嵩山貧居苦吟性介少

合與韓愈為忘形交年五十第進士調溧陽尉日
賦詩曹務多廢令白府以尉代之分其半俸鄭餘
慶鎮興元奏為參謀後卒其友張籍私謚曰貞曜
先生有集十卷

賈島字浪仙范陽人累試不第遂習浮屠徙居東
都工于詩韓愈教其為文島遂去浮屠舉進士大
中末為長江主簿有長江集十卷

司空圖字表聖河中人咸通末擢進士知制誥景

福中拜諫議大夫不赴因亂避地浙川以詩酒游
觀自娛朱溫欲召為禮部尚書圖故作野耄狀示
不可用及聞末帝被弑不食卒年七十二

宋趙普字則平薊州人父向舉族徙洛陽普沉厚寡
言范質薦為軍事判官太祖與語奇之以佐命功
累官樞密使檢校太保乾德二年授門下侍郎平
章事集賢殿大學士上視如左右手事無大小皆
咨決焉淳化三年乞骸骨歸卒贈尚書令追封真

定王謚忠獻咸平初追封韓王配享太祖廟庭
王彥昇蜀人後唐同光中移家洛陽明宗時為東
班承旨歷晉周官至龍捷軍都虞候建隆中累官
原州防禦使西人畏之不敢犯塞

張齊賢字師亮曹州人徙居洛陽太祖幸西都齊
賢以布衣獻策陳十事帝召問賜食且啖且對內
四說稱旨齊賢堅執以為皆善上怒令武士拽出
及還語太宗曰我幸西都惟得一張齊賢異時可

使輔汝太宗太平興國二年禮部放進士榜齊賢
在選中有司失掄置丙科太宗不悅自呂蒙正下
一榜盡賜及第特與京官通判累官右僕射後以
司空致仕歸洛卜居裴晉公午橋莊有池榭松竹
之勝日與親舊觴咏其中卒贈司徒謚文定

李建中字得中京兆人祖稠避地入蜀建中年十
四丁外艱奉母徙居洛陽太平興國八年舉進士
累官工部郎中通判河中府性簡靜恬於榮利前

後三掌西京留守御史臺尤愛洛中風土構園池
號曰靜居性好吟詠每游山水多留題自稱巖夫
有集三十卷子周道周士並進士

李若谷字子淵豐人少孤游學依姻家趙況於洛
遂葬其親於緱氏舉進士補長社尉時州葺兵營
課民輸木檟尉受之吏多以不中程退斥欲苛苦
輸者因以取賕若谷度材別其長短大小為程置
庭中使民自輸真宗時遷知陝州盜聚青灰山久

不散若谷遣牙吏持榜招諭之盜殺其黨與自歸
又知河南府累官資政殿大學士以太子少傅致
仕卒謚康靖

王曙字晦叔河汾人徙家河南咸平中舉賢良方
正科累遷知開封府又知河南召為御史中丞論
玉清昭應宮災進尚書工部侍郎改資政殿學士
知陝州徙河陽再知河南府官至中書門下平章
事卒謚文康所著周書音訓唐書備問莊列旨歸

兩漢詔議及文集若干卷

歐陽修字永叔廬陵人四歲孤母鄭親誨之學畫
荻以教嘗至浙川游龍巢寺因僑寓讀書事詳本
寺和師塔記

文彥博字寬夫介休人天聖五年舉進士逮事四
朝任將相五十餘年封潞國公元豐二年以太師
致仕居洛陽與富弼席汝言王尚恭趙丙劉几馮
行己楚建中王慎言張問張燾司馬光王拱辰仿

白居易故事就粥第置酒相樂尚齒不尚官已而
圖形妙覺僧舍謂之洛陽耆英會光為文序其事
司馬光字君實夏縣人父池令光山生光因以為
名年二十舉進士累官資政殿學士元祐間罷相
寓洛中築獨樂園自號迂叟與邵雍程顥游往來
陝洛間人化其德師其學法其儉在洛十有五年
哲宗即位復召入相拜左僕射卒於官贈太師溫
國公謚文正從祀文廟

張載字子厚，眉縣人。年十九，喜談兵，謁范仲淹。范奇其才，規以正學。因折節，改行。孳孳向道，嘗於關中坐皋比，講易學。者宗之。後入洛，見兩程論易，遂撤皋比，謂學徒曰：「程某言易甚精，盍往從之。」居洛最久，載於兩程為中表。父行以理學相勵，還往尤密。卒後，封鄆伯，謚曰明從祀。文廟。

曾幾，贛州人。徙河南。高宗時，嘗三任嶺表，家無南物。兄開忤秦檜，幾坐廢。檜死，復起，知台州，多惠政。

累官敷文閣待制卒謚文靖

金薛繼先字曼卿河東人南渡後隱居洛西山中課童子讀書事母孝所居化之御史石玠行部過繼先拒不見或問故曰今時政未必皆善御史一有所劾將謂自我發之他日隣里必有併受其禍者其畏慎如此

元好問字裕之號遺山秀容人七歲能詩稱神童稍長淹貫經史百家詩文備衆體為一時文宗學

者稱遺山先生嘗採輯詩篇名中州集累官員外郎金亡不仕流寓永寧

元杜瑛字文玉霸州信安人金末避地緱山世祖南伐至相州召瑛問計瑛舉法與兵食三事對世祖悅命從行以疾辭中統初徵不至除懷孟彰德等路提舉學校官又不就杜門著書以終其身臨卒命其子處立曰吾死當表吾墓曰緱山杜處士天厯中贈翰林學士追封魏國公謚文獻所著有春

秋地理源委語孟旁通律呂星歷禮樂雜志文集
若干卷

陳天祥字吉甫趙州寧晉人以兄祐仕河南從學
洛陽中統三年李璫叛河南河北宣慰司承制以
天祥為千戶屯三汊口防遏之事平罷歸居偃師
南山有田百餘畝躬耕讀書從游者甚眾其居近
緱氏山因號緱山先生至元中起家從仕郎郢復
州等處招討司經歷累官中書左丞議樞密院事

卒贈河南等處中書省平章事追封趙國公謚文忠

明陳靖建蘇州人賣藥洛陽市流賊陷洛執靖建至營罵賊不絕口大言天子尚在諭賊歸順賊怒寸磔之至死不屈

南陽府

周百里奚虞人為虞大夫惠王二十二年晉獻公滅虞得虞君及奚以歸媵于秦奚亡秦走宛楚鄙人

執之穆公聞其賢欲重贖之恐不與乃使人謂楚
曰吾媵臣百里奚在焉請贖以五羊皮楚人歸之
穆公與語大悅授以國政號曰五羖大夫

漢諸葛亮字孔明瑯琊陽都人漢末避亂寓居南陽
躬耕隴畝好為梁父吟每自比管樂建安中先主
屯新野潁川徐庶曰諸葛孔明卧龍也將軍豈願
見之乎先主曰君與俱來庶曰此人可就見不可
屈致由是先主詣亮凡三往乃見遂從先主建都

蜀中策亮為丞相先主崩受遺詔輔政建興初進
封武鄉侯南征擒孟獲後數出兵祁山伐魏十二
年亮悉大衆由斜谷出據武功五丈原與司馬懿
相持於渭南懿閉壁不出乃分兵屯田為久駐計
其年秋卒於軍中兵退懿案其營壘嘆曰天下奇
才也謚忠武今南陽有武侯祠

國朝雍正二年從祀 文廟

金富珠哩德隆安人泰和間從憲宗南征道經於鄧

見順陽山川秀麗風土淳美因家焉後以功封南陽郡侯子孫為鄧州人孫翀見南陽人物志

明張唯江西永豐人流寓南陽以尚書舉第一是年上開文華堂于禁中詔擇中式舉人雋異者肄業其中唯與選正月甲寅命題賦詩稱旨擢編修詔贊善大夫宋濂正字桂彥良等教之上謂曰昔許魯齋諸生多為宰輔卿其勉之萬幾之暇輒幸堂中取其文親評優劣命光祿寺日給酒饌濂輩雖

司啟迪顧諸生皆上所親教不敢以師道自居一日侍燕間詢及諸生肄業進益濂對曰無如張唯者因備述其雋才請錄為弟子員上笑而許之同時進者又有河南張朮禮遇雖不及唯然侍從車駕應制顧問未始異也

董宗夔貴州人以孝廉署浙川教諭遂家焉工詩有故鄉松菊思遊子異地風霜老逐臣之句邑孝廉李宗木和云滇南楚北皆吾與白羽丹江可卜

居

汝寧府

漢王粲字仲宣山西高平人祖父襲為汝南太守粲常寓居汝南今有王粲宅

晉祖逖字士雅范陽人京師大亂逖率其親戚族人擇地避之遂寓淮西今信陽有士雅山

任諒字子諒眉山人徙居汝陽九歲而孤舅欲奪母志諒挽衣泣曰豈有為人子不能養其親者乎

母為感動而止力學自奮年十四登高第累官龍
圖閣直學士知京兆府

汝州

唐田游巖京兆三原人永徽時補太學生罷歸入太
白山又歷荆楚愛夷陵青溪廬其側長史李安期
表其才召赴京師行及汝辭疾入箕山居許由祠
旁頻召不出高宗幸嵩山至其門游巖野服出拜
帝謂曰先生比佳不答曰臣所謂泉石膏肓烟霞

痼疾者因與俱還拜崇文館學士宅居奉天宮左
帝自書榜其門曰隱士田游巖宅進太子洗馬久
之乞還山蠶衣耕食不交當世惟與韓法昭宋之
問為方外友

宋范祖禹字淳夫成都人徽宗時累遷台州主管西
京御史臺靖康初避地汝州汝守趙子櫟邀與共
守旁郡盡陷惟汝獨全歷官至朝請大夫

金許古字道真不詳何許人昌明初登詞賦進士第

拜監察御史彈劾精當上多俞納哀宗時遷左司
諫未幾致仕居伊陽郡守為起伊川亭古性嗜酒
每乘舟出村落間留飲或十數日不歸或汴流而
上老稚爭為挽舟數十里不絕其為時愛慕如此

陳州

宋慎知禮衢州信安人父溫琪有詞學仕錢俶終元
帥府判官知禮幼好學年十八獻書于俶署校書
郎歸宋授鴻臚卿歷知陳州興元府知禮母年八

十餘居宛丘懇求奉養退處十年縉紳稱其孝友
母服除表請納祿至道三年以工部侍郎致仕知
禮自幼至白首歲讀五經周而後止每開卷必正
衣冠危坐未嘗少懈

李成字咸熙系出長安唐之後裔幼而聰敏長更
高邁嗜酒好為詩善琴奕尤工於畫人欲求者先
為置酒酒酣落筆烟雲萬狀乾德初太府卿衛融
守淮陽延為上客因家于陳日肆觴咏病酒而卒

張耒字文潛楚州淮陰人初游學于陳為蘇軾所知後知潁州聞軾訃為舉哀行服因貶房州別駕安置于黃五年得自便遂居于陳自稱宛丘居士耒儀觀甚偉有雄才筆力絕健于騷詞尤長士人就學者衆分日具酒殽奉之卒歿於陳

金劉勳字少宣雲中人初名訥字辨老與其兄漢老俱工詩幼隨宦居濟南十餘載南渡後居陳勳俊爽滑稽一談一笑多出人意表所作詩世多傳誦

劉祁字京叔，渾源人。髫髻從父宦河南，未冠舉進士。失意，即閉戶讀書，肆力窮經，以著述自任。父罷御史，居淮陽，置田園。父歿後，祁春夏在陳視耕，秋冬入汴避亂。在陳數年，遍交賢士大夫，門多長者。車轍嘗自言平生有二樂：曰良友，曰異書。兵亂後，還鄉里，家居讀書，不輟。卒年四十七。所著有歸潛志，傳於世。

許州

南北朝王由字茂道京兆霸城人好學有文才尤善
草隸性方厚有名士風又工摹畫為時人所服仕
魏歷給事中尚書郎東萊太守罷郡寓潁川天平
初元洪威構逆大軍攻討為亂兵所害時年四十
三名流惜之

唐陳夷行字周道本江左諸陳世客潁川夷行第進
士擢起居郎史館修撰累官工部侍郎文宗開成
二年進同中書門下平章事夷行介特與楊嗣復

李珣言事相忤輒引疾求去帝遣使勞起之尋以
侃直罷為吏部尚書拜華州刺史武宗立召為御
史大夫俄還同中書門下平章事進尚書左僕射
未幾以足疾乞歸

宋范純仁字堯夫蘇州吳縣人舉進士累官觀文殿
學士以父仲淹三守潁昌純仁與弟純禮尚書右
丞純粹戶部侍郎兄弟並居於許及卒勅許洛官
給其葬贈開府儀同三司謚忠宣

韓億字宗魏真定靈壽人徙雍丘葬其父保樞於
許之長社遂為許人億舉進士為大理評事知永
城縣有治聲累遷屯田員外郎知相州遷河北轉
運使仁宗時除龍圖閣待制奉使契丹官至尚書
左丞以太子少傅致仕卒贈太子太保謚忠獻八
子綱綜絳維繹縝緯緬人稱八鳳以配荀氏八龍
蘇轍字子由眉州眉山入嘉祐初與兄軾同舉進
士崇寧中以朝請大夫罷居許州號潁濱遺老卒

諡文定

蘇過字叔黨眉州眉山入軾子初軾謫官汝州以形勝類其鄉有終焉之志乃移書於其弟轍曰他日我死當葬於是後軾卒於常州過遵治命葬於邨之小峨眉山遂家潁昌營湖陰水竹數畝名曰小斜川自號潁川居士過早以詞賦顯於時初監太原府稅次知襄城通判中山府俱以能舉所著有斜川集二十卷

李鷹字方叔其先自鄆徙華鷹少以問學稱謁蘇軾于黃州軾稱其才為萬人敵軾卒鷹哭之慟即走汝潁間相地卜兆授其子作文祭之詞語奇壯讀者為悚謂潁為人物淵藪定居長社縣令李佐及里人買宅居之

禹州

宋楊億字大年建州浦城人從祖徽之知許州億往依焉力學晝夜不息淳化中以童子召對授秘書

正字終翰林學士億有別墅在陽翟母往視之因得疾億請歸省不待報而行上親緘藥劑賜之

鄭州

漢崔篆涿郡安平人兄發王莽時位大司空建武初舉賢良自以宗門受莽偽寵慚愧漢朝遂辭歸不仕客居滎陽閉門潛思著周易林六十四篇決吉凶多驗臨終作慰志賦以自悼

宋畢士安字仁叟代州雲中人少孤好學事繼母祝

氏以孝聞母曰為學必求良師友乃如宋又如鄭
得楊璞韓丕劉錫為友遂為鄭人乾德四年舉進
士累官監察御史出知乾州以母老請改監汝州
稻田務淳化二年召為翰林學士景德初契丹入
寇士安陳選將理財之策上嘉納之尋拜平章事
以病上表求免不許明年卒於官贈太傅中書令
謚文簡

陝州

漢楊震字伯起華陰人少好學受歐陽尚書於太常
桓郁明經博覽無不窮究客居弘農之湖縣築校
書堂教授學者居二十餘年州郡請召數稱病不
就衆謂其晚而震志愈篤有冠雀啣三鱣集講堂
前或以為三公之兆後果拜太尉

晉張楷字公超蜀郡成都人通嚴氏春秋古文尚書
除長陵令不赴隱居弘農山中學者從之所居成
市後華陰山南遂有公超市

唐王適幽州人善爲詩尤好讀書懷奇負氣時以四
科募士適笑曰此非吾時耶即携所作書緣道歌
謳趨直言試既至對語驚人下第益困久之聞金
吾將軍李惟簡年少喜士見之與合遂薦爲衛參
軍居歲餘忽不樂載妻子入閬鄉南山中書舍人
王涯獨孤及吏部郎中張惟素比部郎中韓愈日
發書訊問固辭不起

陸扆字祥文嘉興人宰相贄族孫客于陝遂爲陝


人光啟二年擢進士第累遷翰林學士宸工屬辭
敏若注射昭宗優遇之遷尚書左丞徙同中書門
下平章事封吳郡公

吳融字子華越州山陰人力學富詞調昭宗龍紀
初登進士仕終翰林承旨卜居閬鄉皇天原北後
卒葬于營門右融有卜居詩

光州

宋陳慥字季常號龍丘一號方山子眉州青神人風

格凝峻議論慷慨少時慕朱家郭解之為人閭里
之俠皆宗之及壯折節讀書以此馳騁當世然終
不遇晚乃遜於光黃間菴居蔬食不與世相聞



河南通志卷六十九

欽定四庫全書

史部

河南通志卷七十一

詳校官監察御史_臣莫瞻崇

檢討_臣德生覆勘

總校官編修_臣王燕緒

校對官編修_臣盧遂

謄錄監生_臣鄒世俊

欽定四庫全書

河南通志卷七十

德釋

夫丈六騰身而象教之指闡五千授簡而柱史之大
留爰啟二塗各垂霄壤顧味禪於上乘葆天光於內
景淵深微妙非天下之至精固莫窺其秘奧矣蓋如
來之後闕五百歲而有摩騰竺法蘭暢宗風於洛下
入五百歲而有達摩慧可傳心印於少林鉢袋所沿

皆特彰於中土若夫玉室丹臺鶴骨松貌則廣成談
道於崆峒浮丘鍊形於嵩室以至子晉之吹笙王喬
之飛舄莫不雲裝烟駕變化人間則豫又仙靈之窟
宅乎窺道要探禪修可僂指述也志仙釋

開封府

漢鮑靚陳留人為南海太守嘗遇陰長生授秘術一
日行部入海遇風饑甚取白石煮食之又與葛洪
善遂以女妻洪靚還丹陽卒葬石子岡蘇峻之亂

盜發其棺無尸惟大刀一柄盜欲取之聞左右兵馬聲刀亦有聲如雷盜驚懼乃止

唐神秀尉氏人俗姓張幼為沙門至楚蘄春師東山寺宏忍其述偈曰身是菩提樹心如明鏡臺時時勤拂拭莫使惹塵埃時慧能亦述偈曰菩提本無樹明鏡亦非臺本來無一物何處惹塵埃慧能傳衣鉢往曹溪秀住江陵當陽山自是宗分南北兩能為頓宗北秀為漸宗唐武后召秀至都下於內

道場供養中宗即位尤加禮重神龍二年卒謚大通禪師

宋張拱汴人舉進士不第賣藥宜春門忽有道士抵其肆授以棗七枚食之自是不食踰二年溲矢俱絕神氣明爽日可行數百里後游名山不知所終侯先生不知何許人慶厯間賣藥汴京年四十餘無鬚眉瘤贅隱起徧肌體常半醉夜與丐者同處有馬元者盛夏隨之出閭闔門浴池中元因就視

乃一蝦蟆元遽引退候浴出着衣元前揖之侯笑
曰子適見我乎乃召元飲酒肆中出藥一粒曰服
之令子壽百歲此後不復見

文通慧汴人姓張氏名文脫俗白雲寺師令掌廁
盥盆有市鮮者沃於盆文偶擊之仆地死文懼奔
華州總持寺久之為長老忽曰三十年前一段公
案今日當了衆問其故曰日午當自知之遂趺坐
以待時張浚統兵至關中一卒持弓矢至法堂瞠

目視文將射之文笑曰老僧相候久矣卒曰一見
即欲相害不知何讐文語以故卒悟曰冤冤相報
何時了劫劫相纏豈偶然不若與師俱解釋如今
立地往西天視之已立化矣文即索筆書偈云三
十三年飄蕩做了幾番模樣誰知今日相逢却是
在前魔障書畢泊然而化

志言本姓許氏自壽春來居東京景德寺為人卜
休咎書紙揮翰甚疾字體遒勁初不可曉後多驗

有具齋薦鱸者則并食之臨流而吐化小鮮羣泳而去海客遇風且沒見僧操絙引舶而濟客至都下志言謂客曰非我汝奈何客猶記其貌乃引舟者也後卒仁宗以真身塑像置寺中榜曰顯化禪師明勝安號古峯俗姓周幼禮彌陀寺戒律精嚴道行純潔嘗開講大乘諸經五十餘會修葺招提四十餘所永樂中移居祐國寺一時縉黃之士從者雲集後以疾而逝停龕三日飛煙環繞閣維之得舍

利藪聚五色精瑩如珠觀者異之

歸德府

周寇先宋人以釣魚為業居睢水傍百餘年得魚或放或鬻或自食之冠帶不去好蒔荔枝日取葩實食焉宋景公召見之問其道不告公怒而殺之後數十年踞於宋城門鼓琴十餘日而去

墨子名翟宋人外治經典內修道術著書十篇號曰墨子世多崇之公輸子嘗為楚造雲梯以攻宋

墨子說楚王而罷之年八十有二乃嘆曰世事已
可知榮位非常保將委棄流俗與赤松遊耳入周
翟山精思道法想像神仙於是數聞山間誦讀之
聲夜卧有人以衣覆之墨子起曰君豈非山嶽之
靈乎願誨以道教神人曰子有仙骨志且好道故
來相候耳乃授以秘書墨子遂隱居以避戰國至
漢武帝時遣使者致聘不出視其顏色常若五十
許人周游五嶽不知所終

宋丁少微亳州真原人為道士隱華山潼谷密邇陳
搏所居志尚清潔善服氣多餌藥百餘歲康強無
恙太宗召赴闕以金丹巨勝南芝玄芝為獻留數
月遣還山七年而卒

彰德府

漢犢子鄴人少在黑山採松子茯苓餌服之且數百
年時壯時老時好時醜時人乃知其仙人也陽都
沽酒家有女眉生而連耳細而長衆以為異會犢

子牽一黃犢過女悅之遂隨犢子出取桃李一宿而返皆連苑甘美邑中遂伺逐之出門共牽犢而走人不能追也且復在市中數十年乃去後人於潘山下見其冬賣桃李

蕭綦漢末修道天平山延壽宮善吹簫能致鳳凰號碧霄真人道成白日冲舉

晉單道開燉煌人常衣麤褐或贈以綿帛皆不著不畏寒暑晝夜不卧石虎至鄴令佛圖澄與語不能

屈也居臨漳昭德寺日服鎮守藥數丸其藥有松
蜜薑桂茯苓氣時復飲屠蘇一二升自云能瘳目
疾就療者皆驗視其行動狀若有神後至南海羅
浮山中年百餘卒

南北朝道豐北齊時人與弟子三居相州鼓山中不
求利養世之術藝無所不解文宣帝往來於鄴常
召見諮訪應對如流隨事標舉帝常賜酒並蒸豚
道豐即噉飲不辭帝大笑少頃駕去謂弟子曰除

去床頭物及撤床見蒸豚酒俱在臨終謂弟子曰
吾在山久汝等有取汲之勞今去當遺以一泉乃
于庖舍前啟一方石遂有甘泉澄映不盈不減至
今猶存

金李志方初名孟安陽人宣宗時補為戶部令使後
棄官隱隆慮山坐鍊久之謁丘處機號重元子嘗
主天慶宮有白鶴繞壇之異平生不作詩惟羽化
時留頌曰四大既還本一靈方到家白雲歸洞府

明月落棲霞投筆而逝

衛輝府

隋王梵志黎陽人王德祖有林檎樹生瘻大如斗瘻爛德祖撤其皮見一孩兒抱胎而出七歲方能語問誰育我具以告因名梵志其化身之奇如此

宋劉海蟾政和間新鄉縣白鶴觀知事崔重微忽見道士謁于堂下揖之坐不語但微哂重微起取金相贈未入房已聞弄筆聲急回視道士失所在壁

間有題字以仙書證之乃劉海蟾之筆也

昶公輝縣人自幼穎悟精勤戒律住持白茅寺一日杖策閒游謂其徒曰寺東山塢間修篁古柳異于他境乃吾棲真之所竟如其言

懷慶府

虞尹壽子居河陽說道德經教人以無為之道又傳道于彭祖一云作通玄真一經七十卷道德經千二百卷

司環丘仲甯人賣藥于甯百餘年一日地震仲及里中數千家屋臨水皆壞仲死里人棄仲尸于水中收其藥賣之少頃仲披裘而至里人惶懼謝罪仲曰非恨汝也使人知我耳復至甯世謂之謫仙人

張兆期不知何許人與劉道恭謝雅堅張兆期同學道于王屋山四十餘年共合神丹成時伯道先服即死道恭服之又死雅堅兆期懼不敢服棄藥而歸未出山忽見伯道道恭各乘白鹿在山上詣

仙人執節從之二人悲愕悔謝道恭因以服茯苓方授之後二人亦得度世

稷丘君太行山下道士武帝時以道術受賞髮白再黑齒落更生帝東巡太山君乃冠童甫衣黃衣擁琴而迎拜于道左止帝勿上上必傷足指及數里右足指果折帝諱之但為君立祠

趙叔期不知何許人學道于王屋山時時出民間聞有卜者在市叔期往見之卜者曰欲入天門調

三關存朱衣正崑崙叔期知為異人因叩首請其
要道卜者乃授以胎中記一卷叔期拜受之盡其
奧丹就而昇天

南北朝慧思姓李氏修武人以大小乘定慧等法根
引喻俾習慈忍行奉菩薩三聚戒衣服率用布寒
則加以艾北齊天保中駐錫光山縣靜居山梵天
院

唐司馬承貞字子微溫人博學能文隱天台山玉霄

峯自號白雲子師事潘師正得辟穀導引之術睿
宗召問其術對曰為道日損損之又損以至于無
為帝曰理身則爾理國若何對曰國猶身也游心
于淡合氣于漠順物自然而無所私則天下理帝
嘆曰此廣成子之言也辭歸賜以寶琴花帔後玄
宗詔于王屋山置壇室以居之一日忽曰東華君
召我矣乃蟬蛻而化弟子葬其衣冠時年八十有
九賜諡貞一先生

韓湘修武人愈之侄落魄不羈愈勉之學對曰湘
所學非公所知乃賦詩有解造逡巡酒能開頃刻
花之句愈曰子能奪造化耶曰請試為之乃聚土
以盆覆之良久花開葉上出金字一聯曰雲橫秦
嶺家何在雪擁藍關馬不前且曰久之自驗後愈
貶潮州途中遇雪會湘來迎詢其地乃藍關也遂
足成一詩以貽之云

宋賀蘭號棲真不知何許人自言百歲善服氣往往

不食始居嵩山紫虛觀後徙濟源奉仙觀時天子
召至闕應對稱旨奇之賜號宗元大師賚以紫服
白金仍蠲觀之田賦未幾辭還舊居祥符三年卒
時天大雪經三日頂猶熱人多異之

元丘處機字通密山東棲霞人自號長春子嘗寓居
修武縣清真觀研精玄學世祖召見每言為政在
敬天勤民長生在清心寡欲世祖然其言命左右
書之時兵革不息民罹俘馘無所逃命大河南北

尤甚處機使其徒多方救濟之由是為人奴者得復為良民及濱死而得更生無慮數萬人中州人至今稱之

河南府

周王子喬名晉周靈王太子生而神異好吹笙作鳳鳴遊伊洛間道士浮丘公接上嵩高山三十餘年已而去之後復至其山見桓良曰告我家七月七日待我緱氏山頭至日果乘白鶴駐山巔望之不

能到舉手謝時人而去

浮丘伯姓李居嵩山修道白日飛昇嘗作原道歌
云虎伏龍亦藏龍藏先伏虎但畢河車功不用隄
防拒諸子學飛仙狂迷不得住左右得君臣四物
相念護乾坤法象成自有真人顧又著相鶴經王
子喬傳

祝鷄翁洛人居尸鄉北山下養鷄百餘年有千餘
頭皆立名字暮棲樹上晝放散之欲引呼名即至

卷七十
賣鷄及子得錢千餘萬輒棄去之吳作養魚池後
昇吳山有白鶴孔雀百常止其傍云

宋倫洛陽人厲王甲辰歲凝神慕道事老聃授之
上道能飄然飛步凌波涉險或化麋鹿或為鳩鵲
弋獵者不能近或為蠱癩之人與病者寢處自然
疾瘥宣王丁巳歲上昇為仙

漢王興陽城人常居宛谷中武帝元封二年登嵩高
山見一仙人耳出頭頂下垂至肩帝因問之仙人

曰聞此山有石菖蒲一寸九節服之可以長生故
來採之言訖不見時興聞之乃采服不息後為蒲
江主簿聞縣境亦仙靈窟宅遂棄官隱於秋長山
山有洞穴中藏千餘歲金蟾世傳見之者當得道又
有瓊花樹花開即有昇仙者興居此修鍊九載忽
瓊花吐艷金蟾躍出遂入洞遇金液之丹拜而服
之卒如其兆

摩騰本中天竺人解大小乘經明帝夜夢金人以

問羣臣傅毅曰臣聞西域有神其名曰佛陛下所夢將必是乎乃遣中郎蔡愔等往天竺尋訪因見摩騰要還中國特於洛邑西門外立精舍以處之遂譯經四十二章後卒於洛陽中國有沙門蓋自摩騰始也

竺法蘭中天竺人誦經論數萬章為學者師與摩騰同入中國其言皆有徵信蔡愔所得西域經皆蘭所傳

晉佛圖澄西域人永嘉中居洛善役使鬼物聽鈴鐸
知吉凶言事無不驗左乳旁有一孔通腹內時以
絮塞之當夜拔絮一室洞明或臨流引腸洗之已
復納入時石勒石虎相繼敬禮之比死之日有人
見於流沙虎既殮澄心疑其不死因發墓開棺視
之惟見一石虎在棺內虎曰師葬我而去矣未幾
虎死

阿羅竭未詳氏族誦經二百萬言獨宿山野武帝

時常至洛陽時患疫竭為咒十瘡八九元康初止
婁至山石室中去水甚遠竭以左脚碾石壁壁陷
水出比卒闔維之焚爍累日尸不煨燼乃移還石
室

耆域天竺人周流華戎人莫能測惠帝末嘗至洛
陽時南陽勝永文寓湍水寺足攣屈不可行域取
淨水楊枝咒之永文起行如故一日辭還天竺洛
中沙門數百人各請域食域皆許往明日五百舍

皆有一域已而行衆皆送至城外域徐行追者不能及也是日有從長安來者見域在彼寺中賈客胡濕登是日將暮逢域於流沙計九千餘里云

南北朝跋陀天竺人一稱佛陀學務靜攝博通經法孝文帝一見敬隆誠至及定都伊洛勅設靜院居之陀性愛幽棲林谷是託屢往嵩嶽擬謝人世未幾帝勅就少室山為之造寺今少林是也

達摩禪師南天竺婆羅門種神慧疎朗聞皆曉悟

梁武帝普通初至廣州刺史表聞武帝遣使迎至
金陵帝親問曰朕即位以來造字寫經不可勝數
有何功德師曰並無功德此但人天小果有漏之
因雖有非寶帝曰如何是真功德師曰淨智妙圓
體自空寂如是功德不以世求帝問如何是聖諦
第一義師曰廓然無聖帝曰對朕者誰師曰不識
帝不省師遂去梁折蘆一枝渡江北趨魏境尋至
洛邑初止嵩山少林寺終日面壁而坐九年逝焉

莽熊耳山魏宋雲奉使西域回遇師于葱嶺見手
携隻履翩翩獨逝雲問何去曰西天去又謂曰汝
主已厭世雲聞之茫然別師東邁暨復命明帝已
登遐矣迨孝莊即位雲具奏其事帝令起墳視之
惟空棺一革履存焉

慧可虎牢人姓姬氏出家于永穆寺忽于寂默中
見神人謂曰將欲受果何滯此乎大道非遙汝其
南矣遂至少室師事達摩晨夕參承盡得其傳師

將示寂西返天竺乃顧慧可而告之曰昔如來以
正法眼傳伽葉輾轉傳受以至於我我今傳汝汝
當護持并授袈裟以為法信可跪受其傳今稱二
祖云

唐一行姓張氏讀書不再即暗誦師事普寂禪師出
家披剃於嵩山師嘗設食於寺大會羣僧時有盧
鴻一者道高學富隱於嵩山因請鴻一為文讚美
其會至日鴻一持其文至寺其師受之置於几案

上鐘梵既作鴻一謂普寂曰某為文數千言字僻
而言怪盍於羣僧中選聰穎者授之寂乃令一行
既至伸紙微笑止於一覽復置几上鴻一輕其疎
脫而竊怪之俄而羣僧會於堂一行歷階而進抗
音宣揚一無遺忘鴻一驚愕久之謂寂曰非師所
能教也後受天台異人數學所著有大衍歷圖及
易訣一卷開元末減度於嵩山

玄奘姓陳氏名緯緱氏人武德中住莊嚴寺受諸

經論一聞不忘後徧遊荆揚等州訪諸道隣復還京輦貞觀初求西域經至罽賓國道險不可過焚閉室而坐夕見一老僧授以心經一卷誦之因得坦途虎豹亦無跡遂至佛國得經六百餘部以貞觀十七年還太宗命住玉華翻譯經藏麟德初告門人曰有為之法必歸磨滅泡影形質何得久傳行年六十五必卒至期果然色貌如常葬於白鹿原初往西域時手撫靈巖寺松枝曰吾西求佛教

汝可向西而長若吾歸即却東回使吾門弟子知之及去其枝年年西指約長丈餘一日忽東向弟子曰吾師還矣乃西迎之果至至今稱其松為摩頂松云

呂嵒字洞賓京川人號純陽子天寶末三舉進士不第遊江湖間遇鍾離子授金液大丹之術年五十道始成嘗騎白鹿兩過宜陽錦屏山俱有題詠今山上烟霞亭石刻存焉

自在禪師學道既成欲幽栖名山問於師師曰逢牛則止北行至嵩縣南山問道或告曰此野牛嶺也其牛據林莽噬人獵者亦不敢施機械爾孤行且止自在默然憶師語而進至嶺果見野牛自在以法咒之牛馴伏遂跨以行語曰若到吾刹即止行至下雲岩寺牛止自在曰此地雖佳而狹小更進之乃行至上雲岩寺止自在曰可矣下牛趺坐而牛奔突直上後山絕頂躍入池中俄而雲起晝

晦有龍現形橫騰東西兩山之上自在祝云婆伽
婆伽夙性未化見大法身驚徒衆可仍歸池中吾
為說法於是龍斂形復入池中今岳頂小池圓丈
曰龍池

邢和璞不知何許人善算心術凡人心之所計布
算而知之卜居嵩潁間石堂山之洞著潁陽書三
篇復能以法活死者文瑣不載宋歐陽修作石堂
山隱者詩以贈之見金石錄

孫仙姑名不二寧海人馬丹陽之妻受道于王重陽後從風仙姑遊居洛六年忽謂弟子曰真師有命當赴瑤池遂更衣跣跣而化

元緊那羅西天菩薩也至正初至少林蓬頭裸背跣足厨中作務數年至十一年紅巾賊至少林僧乃持一火棍出變形數十丈獨立高峯賊見驚遁僧大叫曰吾緊那羅也言訖不見

南陽府

漢陰長生新野人明帝后之曾祖不好榮位專務道術聞馮明生者得度世法乃求見於太和山中執役二十餘年不懈乃偕入青城山立壇歃血以太清金液神丹受之丹成著書九篇白日飛昇

南陽公主下嬪王咸至綏和間王莽秉政謂咸曰國危世亂但當退而修身咸不能從公主遂於華山結廬精思丹道歲餘乘雲而去咸追之昇層嶺漠然無迹忽於嶺上見遺朱履一雙取之已化為

石後人名其峯曰公主峯

王喬河東人顯宗時為葉令有神術每月朔望常自縣詣臺朝帝帝怪其來數而不見車騎密令太史伺之言其至有雙鳧從東南飛來乃候其至而羅之得雙鳧則四年中所賜尚書官屬屨也每當朝時葉門下有鼓不擊自鳴聞于京師後天下玉棺于庭前喬乃沐浴服飾寢其中蓋自立覆葬于城東一夕土自成墳百姓為立廟祀之凡吏人有

所祈禱靡不應焉

晉麻衣子姓李名和生而紺髮美姿稍長厭世遂入
終南山遇一道者授以道秘戒之曰南陽之間湍
水之陽有山靈堂巖洞其旁神開汝鄉汝則往之
可以翕神功於蒼茫麻衣往求之過樵者導至其
所居洞中十有九年義熙間大旱居民張奭率衆
請焉麻衣以無術拒之請者不輟一夕忽有少年
十二人謂麻衣曰若再請但許之麻衣怪而諾之

翼日雨果大至十二人復來拜曰吾屬龍也上帝
以師道業成勅令輔師行化耳劉宋大明初端坐
而逝

陳永伯南陽人得淮南王七星散方試合服之二
十八日忽然不知所在永伯兄子名增族年十七
亦服之其父繫其足閉密室中晝夜守之滿二十
八日亦不知其所之本方曰服三十日而失其所
在後人不復敢服服之者臨去必有仙官來迎之

但人不見耳

唐天然初習儒業將舉進士道遇禪客曰選官何如
選佛天然悟即謁馬大師大師曰我子天然遇留
即止後振錫南陽見山巒疊出方四顧之頃然見
一老人云此大留二留三留之山也師因憶大師
之言遂棲止之唐長慶中示寂丹霞觀寶厯中謚
知道禪師塔號曰妙覺云

五代法聰新野人八歲棄俗至襄陽傘蓋山白馬泉

築室以棲梁晉安王來都襄雍乃造禪室見堂內
有虎聽以手按其頭虎即閉目伏地王因告境內
虎災聰即入定須臾十七大虎至聰命弟子以布
繩繫頸而去自是無害所居夜有光明照數里不
假燈燭年九十二端坐而化

宋景知常鄧州人少從趙彊禪學道顏如渥丹太宗
知其名召至俄辭去嘗遇呂嵒時或語唐昭宗以
來事殆數百歲或祁寒浴溪或大暑偃地有書生

病憊常噓酒飲之即能行所居夜神光滿室卒舉其棺甚輕開視惟衣衾有異香焉

張虛白鄧州人通太乙六壬術留心丹竈遇異人得秘訣徽宗聞其名召管太乙宮恩賚無虛日官太虛大夫金門羽客出入禁中終日論道無一言及時事曰朝廷事有宰相在非予所知也金人尤重之忽一日語人曰某年月日吾化期也已而果然

張仙姑南陽人有秘術人有疾仙姑輒瞑目潛為布氣攻之俄覺腹熱如火鳴聲如雷雖沉痼者無不愈徽宗常召至東都後不知所終

汝寧府

周任光上蔡人善餌丹賣於都市里間積八九十年面顏如數十歲趙簡子聘與俱歸常住栢梯山後不知所終

漢費長房汝南人為市吏有老翁賣藥懸一壺於肆

方罷輒跳入壺中市人莫之見獨長房於樓上見之異焉因往再拜奉酒脯翁乃與俱入壺中惟見玉堂嚴麗旨酒甘飭盈衍其中共飲畢而出後長房欲求道顧家人為憂翁乃斷一竹杖懸之舍後家人見之以長房縊死葬之長房從翁入山授以秘術及歸自謂去家旬日而已十餘年矣家人謂其久死不信長房曰往日所葬但竹杖耳發棺視之果然初桓景常學於長房一日謂景曰九月九

日汝家有大災可令家人作絳囊盛茱萸繫臂登高山飲菊酒禍可消矣景如其言舉家登高山夕還見牛羊雞犬皆暴死焉

晉許遜汝南人母夢金鳳御珠而生初名鳳祥好射獵父嘗誡之曰好勇不好學其蔽也亂曷遜志為學乎因改名遜字敬之折棄弓矢刻意為學博通經史及五行讖緯之學莫不兼綜尤好神仙修煉之術太康初舉孝廉為蜀旌陽令歲饑嘗點瓦礫

為金役民于後圃俾得輸負租為符咒以治疫疾
活者甚眾知晉室將亂即棄官歸聞西安吳猛得
至人丁義神方因往師之後遇日月二帝君授以
淨明忠孝大道并三五飛步斬邪之法得除上遼
巨蛇豫章老蛟復作鐵柱鎮之水妖永絕精修日
進道法益高至寧康甲戌年一百三十六歲八月
朔旦大會弟子告以冲舉之期至十五日忽有羽
蓋雲車自天而降與其弟子家屬同時飛昇雞犬

亦隨去後于宋徽宗時復顯異徵政和間勅封神功
妙濟真君改觀曰玉隆萬壽宮有淨明忠孝之道
傳于世

許邁字叔元遜從弟未弱冠時常造郭璞璞為
之筮遇泰之大畜曰元吉自天宜學升遐之道後
遍遊名山採藥服氣乃改名元字遠遊入臨安西
山著詩一十二首莫知所終

許穆邁從弟亦入華陽洞得道

應夷節汝南人生不喜茹葷性敏慧長遊天台龍
虎山師馮惟長得上清法栖于天台之道元院日
誦黃庭大洞二經為人祈福數致感應忽一日沐
浴入靜凝神翌日解化是夕清香馥郁猿鳥悲鳴
及就窆時但有空棺而已

宋褒信道人失其名與人較奕每局祇負人一子後
卒于褒信託後事于一村叟及數年村叟謀為改
葬但見空棺衣衾而已留一詩云爛柯真訣妙通

神一局曾經幾度春自出洞來無敵手得饒人處
且饒人

元楊道和上蔡人生而奇異有相人者見之曰此子
仙風道骨非風塵中人及長棄俗修道居蔡之白
雲洞復值異人授訣要至元初忽白日昇舉後有
人見之淮上

明孫樂庵採藥商山常于市化得柴薪運積邑東南
崇國寺後山之巔一日坐柴薪中吐火化身火焰

閃爍合掌端凝肺肝燎灼後有遇于塗者蓋已脫去也

汝州

上古廣成子軒轅時人隱居汝州崆峒山石室中黃帝造問治身之道答曰至道之精窈窈冥冥至道之極昏昏默默無視無聽抱神以靜形將自正必靜必清毋勞爾形無搖爾精乃可長生慎內閑外多知為敗我守其一而處其和故千二百歲未嘗

衰老乃授帝陰陽經帝悅乃命奏鈞天之樂至今
有臺名曰鈞天

周鬼谷子姓王名詡楚人嘗入雲夢山採藥得道顏
如童少今伊陽城東南八里有石洞存焉蘇秦張
儀嘗受書於此三年辭去鬼谷曰二子輕松喬之
永壽貴一日之浮榮惜哉鬼谷居人間數百歲後
不知所之或曰嵩高之陽城亦有鬼谷

晉張元化葛元弟子嘗寓汝州之清溪觀一日召道

士周元亨曰吾化之後母損吾軀既化元亨遵其命葬之後五年有汝卒戍於蜀者逢一道士於山峽間謂曰汝為我持此書與胡司馬周尊師卒歸投書二人開緘視之乃元化新札謝二人葬之厚也發棺惟故履存焉宋政和間封冲妙先生

馬丹陽法名元寶相傳丹陽遇童子食瓜自蒂怪而問之答曰香從鼻裏出甜向苦中來豁然驚悟遂于此修道成真今城北街有丹陽觀

唐貞禪師天元間駐錫風穴山嘗習衡陽三昧其化
大行一夕溘然示寂守宰李嵩閣維之得舍利千
粒明皇謚為七祖

羽張三丰遼東人或云寶鷄人洪武初往來襄鄧許
邨之間嘗居汝州鍊真宮人莫之識已而去又寓
汴延慶觀時大理卿王公字為嬰兒三丰過其里
見而異之謂人曰此兒他日必貴顯後果如其言
天順二年羽化于成都鶴鳴山詔封通微顯化真

人

陳州

上古宛丘先生失其名居宛丘故稱宛丘先生服制
命九得道至殷湯末已千餘歲以其方傳弟子方
若春服之亦三百歲視之如嬰兒狀彭祖師之受
其方三首

許州

漢劉諷潁川人景帝時仕為公車司馬已事司馬季

主得服日月精華之術晚歸鄉里脫形杖履而去
李根許昌人有趙買者言聞其父祖已見根甚習
及買見根時買已八十四歲而根之顏尚如年少
有得根素所著書讀之其自記云漢元封中學道
於某以甲子記之已七百有餘歲矣

禹州

漢上成公密縣人出行久而不還後歸語其家云已
得仙矣因辭去家人但見其舉步漸高良久悵望

不及時陳實劉韶嘗見其事而為人言之

鄭州

金訾亘嘗師丹陽馬鈺長春丘處機自號守真子人稱訾仙翁遊歷濟南抵鄭之釣臺太和中大雪深丈餘亘不出者已十餘日人以為死除雪視之端坐凝然殊無寒餒色貞祐間兵破關陝軍民恐懼亘曰無妨已而果然

陝州

周尹喜周太夫為函谷關令善內學隱德修行時人
莫知之老子西遊喜先見其然知有真人當過物
色而候之果得老子老子亦奇之為著書以授後
與老子俱遊流沙莫知所終喜亦自著書九篇號
曰關尹子

漢河上公不知姓氏文帝時結廬河濱時帝好老子
有未解者遣使問之公曰道尊德重非可遙問於
是帝遂枉駕問之授老子章句二卷曰熟研此其

疑自解今有河上公廟在陝州北唐人多有題咏
在焉

唐萬回姓張氏閬鄉人初父命耕田回直去不顧口
惟連稱平等因耕一壠長數十里遇溝見阻乃止
父怒擊之對曰總耕何分彼此後其兄戍安西父
母憂思回乃裹衣糗朝往視之暮返其家弘農抵
安西蓋萬餘里先是玄奘詣西域求佛經見佛所
有題記菩薩謫閬鄉者自西域歸後因訪見萬回

施三衣餅鉢而去後臨終呼其徒求本鄉河水弟子莫知所求萬回曰堂前便是河水遂於階下掘井忽河水湧出飲竟而終

明達不知所從來住閩鄉萬廻故寺人謁問休咎明達但以意示之李林甫為黃門侍郎扈從西還謁達達加秤於其肩至京遂作相李雍門為湖城令達忽請其馬雍門不與間一日將乘出馬忽庭中人立雍卒乘之是日墜馬死達又嘗北望言曰

此川中兵馬何其多也及哥舒翰擁兵潼關而此間盡為戰場矣

五代辛七師陝人為兒時即謹肅未嘗以狎弄為事父母異之十歲好浮圖法閱佛書自能辨梵音不由師授其後父為陝郡守從之官時郡南故有瓦窰七所及父卒於官辛七哀甚而狂遂遁去其家僅跡其所至至郡南見辛七在一窰中端坐身有奇光燦若煉金家人驚異次至一窰又見一辛七

在焉歷七室俱有一辛七在中由是陝人呼為辛

七師

宋柴通元閬鄉人為道士于承天觀年百餘歲善辟
穀言唐末事歷歷可聽太宗召至闕下通元惟懇
求歸後真宗祀汾陰又召至行在命坐訪以無為
之術所陳稱旨上遂作詩賜之并賚以茶藥束帛
且詔修其道院蠲其田租度弟子二人明年通元
作遺表自稱羅山太乙洞主遣弟子以龜鶴為獻

又召官僚士庶言生死之要夜分盥濯焚香遲明
卒

光州

南北朝知顓天台山智者禪師陳天嘉初謁慧思於
大蘇山思一見即謂曰昔靈鷲同聽法華經今復
來矣即示以普賢道場說四安樂行師入觀三七
日身心豁然慧思曰非汝弗證非吾莫識

唐僕僕先生居舊仙居縣黃土山嘗餌杏丹乘雲往

來刺史李休光以爲妖叱左右執之龍虎見於其側先生乘之而去天寶初因以僊居名縣

河南通志卷七十